



UNIVERSITÄTS-  
BIBLIOTHEK  
PADERBORN

## Universitätsbibliothek Paderborn

**R. P. Pauli Segneri Societatis Jesu Brevis Vitæ Historia  
cum ejusdem Concordia Quietis & Laboris in Oratione,  
Expositione in Psalmum Miserere, Considerationibus de  
Inferno, Expositione Cantici ...**

**Massei, Giuseppe**

**AUGUSTÆ Vindel. & DILINGÆ, 1707**

**VD18 12383155**

Illustrissimo Domino Domino Francisco Christophoro S. R. I. Lib. Baroni à  
Schellenberg ...

[urn:nbn:de:hbz:466:1-47773](https://nbn-resolving.org/urn:nbn:de:hbz:466:1-47773)



Illustrissimo

DOMINO DOMINO

FRANCISCO  
CHRISTOPHORO

S. R. I. Lib. Baroni à Schellenberg, Domino  
in Kislegg, Waltershofen, Rötsee & Fesenheim &c. S. Caf.  
Maj. à Consiliis, Liberae Imper. Equestris Nobilitatis Suevicæ  
per Hegoiam, Algoiam & ad Acronium  
DIRECTORI &c.

*Domino ac Patrono perquam Gratiſo  
Interpres.*

**P**Rodeunt tandem, Vir illustrissime, in lucem publicam pridem promissi, à plurimis expetiti, residui libelli ven. memoriæ P. Pauli Segneri, quibus ipsa Vitæ ejus Historia præmittitur. Hos ego subsecivis horis latinè loqui doctos Illustrissimo tuo nomini, pro singulari meâ in te observantiâ, dedico consecroque. Nec timo quorumcunque vel murmur, vel admirationem, qui ab re esse dicent, homini de seculo, Equiti, civilis administrationis gubernationisque officiis occupato, nuncupare Historiam Vitæ Viri religiosi, potissimam annorum suorum partem versato in scelerum licentiâ totâ Christiana eloquentiæ vi corrigendâ, in Regionibus ac Provinciis Apostolico ritu percurſandis, Animabus ad DEUM totâ virium facultatûmque omnium contentione reducendis. Multo minùs lucubrati-

nena

nem, quæ de recta Orandi ratione, dedocendisque, qui in hac à nonnullis spargebantur, erroribus tota agat, ejus ordinis viro offerendam: nec disparem esse reliquorum, quæ hoc volumine continentur, operum rationem: omnium notitiam lectionemque non aliis magis, quàm religiosis hominibus convenire, horum terenda manibus, horum imitatione exprimenda: alia tibi, ceterisque, qui eadem tecum vitæ conditione sint, convenire, quæ profanam historiam, civilis prudentiæ præcepta, rectam populorum regendorum rationem complectantur. Hæc, inquam, murmura, quia eorum sunt, qui nullam tui notitiam habent, penitus non moror, planèque confido, me munus tibi allaturum, quod placeat, quòdque libenter totis Authoritatis tuæ opibus, Patronus optimus, sis tuiturus. Nam imprimis compertissimum habeo, quanti facias harum omnium lucubrationum parentem Segnerum, quem non ipse modò ex aliis ejus libris æstimare didicisti, sed ut eundem alij, Ecclesiastici maximè ordinis viri, æstimarent, seduloque evolverent, non citra æris argentique impendium, adlaborasti. Et quem tu verbis docentem cum voluptate attendisti, cum tu factis longè etiam efficacius moventem cum tædio auscultes? Non nescio quidem, illa severitatis tam insolitæ, asperitatisque tantùm non crudelis exempla non posse prudenter tui ordinis hominibus ad imitandum proponi; quis tamen est, qui, pro gradu suo, per dura & aspera salutem Animæ curare, pro DEO Conditore ac Servatore suo, pro proferenda ejus gloria, fortiter & agere, & pati, non possit, aut debeat? Ad hoc autem quem laboriosus non minùs, quàm in se perpetuò durus P. Paulus non excitet?

Quamquem autem ad te non spectat Animas aut Contemplationis, aut Meditationis methodo ad excelsum perfectionis

culmen mānuducere, non erit tamen tibi injucundum, legere re-  
rectas subtilissimas in speciem fraudes, quibus tam non ad con-  
fortium cum DEO intimum illæ adducebantur, ut potius ab eo  
abductæ longissimè, *cum Spiritu cœpissent, Carne consumarent.*

Jam si Regium fuit, plenum illum profundissimis sensis Psal-  
mum *Miserere* meditari, scribere, ad posteros transmittere, an  
infra Illustres viros erit, accuratè legere, quæ ad eruenda illa,  
quæ dixi, sensa vir in hoc genere exercitatissimus est commenta-  
tus? Id enim vero tum credam, cum inter hos erit, cui opus  
non sit divinis miserationibus, ad quas unicum est in tam mul-  
tiplici æternùm pereundi periculo per fugium. De Inferno aper-  
to quid dicam? ó quanto satius foret viris, quamlibet magnis,  
in eum nonnunquam cogitatione, dum inter homines degunt,  
descendere; horrendam illarum pœnarum atrocitatem animo  
obicere, profundè meditari, quàm quæ qualésque illæ sint, ine-  
vitabili jam malo, experiendo addiscere!

Mariani tandem Cantici sensa intima rimari, displicere potest  
nemini, quàm cujus Animæ curæ non est *Magnificare Domi-  
num*: quorum à societate, Vir Illustrissime, scio quàm procul  
absis, quàmque sincerè cupias Magni Numinis cultum proferri  
latissimè; & Maximæ illius Matris Virginis, cujus incompara-  
bilia decora admiranda Synopsi ibi comprehenduntur, honori-  
bus cunctos & tuos, & alienos esse quàm impensissimè devo-  
tos. Aut fallor igitur vehementer, aut nihil est in Segne-  
rianis hisce aut gestis, aut scriptis, quòd tibi magnopere non  
sit placiturum. Atque utinam his ego nihil gratiæ ac venusta-  
tis latino meo stylo detraxissem! Non ignoro tamen, etiam  
hunc, qualiscunque est, tibi tantillum saltem pro tua huma-  
nitate, & in immerentem affectu, arrisisse; quæ inter ce-  
teras

teras causa me impulit, ut hoc memoris animi publicum  
cuperem extare monumentum: maximè cum non me  
tantum, sed alios quoque, à me tibi commendatos, lu-  
culentis favoribus atque beneficentiâ sis complexus; etsi  
Tu bene fecisse contentus nihil minùs cupias, quàm ut  
constet, qui & quomodo per te sint adjuti.

Accedit his, quibus tam arctè devinctus Tibi sum,  
titulis alius non inferior. Jam pluribus ab annis idem,  
etsi facultate tam dispari, negotium nos distinet; quod  
tu cum tanta geras fide, constantiâ, dexteritate, authori-  
tate, me quoque exemplo tuo impellis, ut & ego omnem  
segnitiem excutiam. Et spero non multo post hujus meæ  
operæ fructum publica in luce conspiciendum. Hic qui  
sit, sufficit nos duos nôsse. Nam meos quidem conatus,  
quò sunt ignoti magis, velut in cuniculis, aut fossis sub-  
terraneis laborantium, eò spero fore efficaciores.

Atque hæ, quas tanquam aliud agens hucusque  
commemoravi multiplices laudes tuæ, ut palàm omni-  
bus faciunt, quàm jure ac meritò inter multos, qui animo  
obversabantur, tuo potissimum nomini sacros hos libel-  
los voluerim, ita non obscurum relinquunt, quàm rectè  
ac sapienter egerit Illustrissimum Equitum Imperij, quod  
circa Acronium, in Hegoia, Algoiâque est, Collegium,  
dum te potissimum difficillimis, quæ nuper fuerunt, tem-  
poribus Directorem optavit, cujus virtute, providentiâ,  
X X sapien-

sapientiâ niteretur, suasque ut fortunas ac opes, ita & dignitatem incolumitatêque tueretur.

Passus es te exorari, admissoque in humeros non impares onere, eâ prudentiâ, vigilantia, æquitatis, humanitatis commendatione illud gessisti, ut & alieni, quorum tum armis Patria infestabatur, & tui te admirarentur, publicamque incolumitatem, magnum partem tibi in acceptis ferrent; cum aliâs, rebus adeò turbatis, gravissimâ accipi damna potuissent: quæ vel sic in irruptione tam non expectata, vitari omnia non potuere. Qui autem in sæva tempestate non infeliciter rexit clavum Navarchus, facilè conjici potest, quàm tranquillo jam ferè mari prosperè, cum omnium solatio, navim gubernet.

Quamquam autem domestica hæc decora tua Equites nobilissimi in electione illâ spectârint, quia tamen hoc habet nobilissimus iste ordo, ut non nisi Majorum etiam suorum ornamentis inclyti, & qui nullâ plebeia face à multis retro annis sanguinem infecerint, in eo censeantur, hoc vetustæ nobilitatis prærogativo jure te quoque in paucis eminentem facili negotio agnovere. Quam enim hoc singulariter memorandum, Georgium Schellenbergium jam tum, cum Imperij Romano-Germanici clavum Henricus, quem Aucupem dixere, teneret, atque adeò septem integris, & quod excurrit, abhinc seculis

culis, tantâ fuisse eloquentiâ, ut Germani Ciceronis nomenclaturâ indigitaretur; tantâ insuper rei militaris & peritiâ & fortitudine, ut vix ulli in toto Cæsaris exercitu cederet, subindéque ab hoc eodem in ludis equestribus instituendis ordinandisque Duodecimvir eligeretur.

Est hoc antiquitatis clarissimum testimonium; quantæ autem jam olim inclytæ familiæ opus fuerint, inde apertè monstratur, quòd Curiensis in Rhætis Ecclesia grata agnoscat, se Schellenbergiorum beneficiâ magnam partem ad eas, quas olim possidebat opes evasisse. Nihil jam dicam hac à familia nomen traxisse inclytas in exteriorè Rhætia arces, & ditionem non procul Veldkirchio; tantæque ex ea progenitos herores fuisse authoritatis, ut aliquot centenis abhinc annis Principali Parthenoni Lindaviensi Impetij nomine Advocati darentur; quod munus nostrâ prope memoriâ Augusta Domus Austriaca sibi vindicârat.

Tacebo etiam eidem memorato Parthenoni Abbatissam aliquot abhinc seculis è tua Familia præfuisse Siggenam, tum aliis laudibus illustrem, tum maximè beneficiâ in S. Francisci Alumnos Alumnâsque; quæque sunt alia tum à Joanne Gulero, inclyto Rhætiae Historico, tum à Scriptoribus aliis posterorum memoriæ diligenter commendata. Tam multa igitur & vetera & nova, Progenitorum tuorum tuâque ornamenta, ut te Eque-  
stri

stri S. R. J. Ordini spectabilem venerabilēque fecerunt, ita non minùs demonstrant, quàm non temerè ego te & meum, & horum aliqua parte meorum partuum Patronū præ tam multis adopraverim. Me autem ut apud alios, ita & apud tuam illam humanitatem, animi modestiam, próque omnibus, maximè qui bono publico emolumentum aliquid afferre student, gratificandi voluntatem paratissimam purgabunt à nota hominis & præfidentis nimium, & dignationem tam sublimem non satis reverentis; tanto magis, quòd sicut hætenus, ita & deinceps magna voluptate sis spectaturus, his è libellis nonnihil in Magnum DEUM gloriæ, in mortalium animos utilitatis, ut spes est, redundaturum. Sic utique patieris me etiam posthac in animo tuo manere loco quo hætenus, mēque agnosces,

Illustrissimo nomini & honori tuo

*devotissimum addictissimūque*

MAXIMILIANVM RASSLER  
S. J.

AUTHO.